

第五册

淮水二

道光十三年至宣統三年
(附編)

再續汴水金鑑

諸青來



781.026
1377
5

再

續

光

水

金

鑑

再續行水金鑑卷第四十四

淮水編年十二

道光十三年正月初十日朱士彥敬徵奏爲遵旨履勘高堰山盱揚河揚糧裏河各廳工程分別急修緩修賠補各條先行請旨事竊臣等前在于家灣工次接准軍機大臣字寄道光十二年十二月十九日奉上諭張井奏黃運湖河各工因本年水漲殘損請分別估辦以資來歲修防一摺所奏自係應修之工而現在經費實有不敷之虞難從所請著朱士彥敬徵就近覆勘酌量輕重緩急具奏請旨固不可遲誤要工亦不可致帑項措辦不及等因欽此臣等於十二月二十六日由桃南于家灣查勘東西兩壩及河頭河尾各工後當卽率同隨帶司員戶部郎中王壽昌工部主事王巽前往堰盱揚河一帶查勘於二十八日恭報引河挑挖完竣摺內業經奏聞在案查該河督原奏因本年洪湖水勢長至二丈一尺九寸爲從來所未有而黃水及運中河之水又較道光二年異漲各有增多所在撲岸盈隄加以風狂浪湧所有閘壩隄河各工衝刷殘場不一而足若不趕爲估辦來年蓄洩修防勢將無可措手條列應辦各工將堰盱補修風掣石工揚河揚糧加幫東隄土工邳北宿北桃北外北山安海防六廳培補黃河大隄土工剔歸當年另案於歲搶修及例撥銀內動支辦理仍需銀一百六十萬兩請先撥銀八十萬兩等語臣等欽遵聖訓前赴高堰山盱揚河揚糧及裏河各廳詳細履勘悉心籌議謹將實在情形酌量緩急輕重分繕條款恭呈御覽 一冊造高堰廳屬擬加卑矮石工二十六段共長一千六

百四十九丈零山盱廳屬擬加卑矮石工六十段共長一千四百三十九丈零臣等查湖水現深一丈五尺六寸其卑矮石工出水三四層不等而臨湖石工計長一百數十里自嘉慶十年起屢次奏明開段加砌以致高低不一今按原估清冊丈量山盱應加丈尺間有不符層數亦宜再酌卽照所請准其加砌其卑矮工段尙多仍不能一律配平且與賠修補修各石工同時辦理難免牽混應令該河督將應賠新工嚴飭各該員趕緊賠修並將應補舊工及背後甄灰土各工均於本年盛漲以前一律修補完整由該河督親往查驗具奏至卑矮石工處所臣等擬照現在揚河西岸估砌碎石坦坡高五六尺將海漫石尾壓於坦坡之下旣省馬鞍埽工亦可抵禦風浪兼護石工子堰較加砌稍有撙節應由該河督查看情形奏明後分年覈實辦理 一冊造山盱舊信壩補還石工智壩仁河林家西壩補修跌塘改挑義河頭並壩下束水二隄各工臣等查林家西滾壩應由革職留工之通判張慰祖照例賠修另片具奏外查舊信壩外越護埽實係挺入湖心風浪抽掣可慮應請補還石工並照式幫寬土隄使內外隄工一律齊整其壩後舊料儘可選用仍應確切覈估又智壩仁河各石底俱因啓放衝損均應照舊修復惟義河據該河督奏稱跌塘過深如在原處修復來年斷難竣工請另挑河頭一道河尾仍達義河較之修復石底所費相當臣等查義河金門兩金剛牆並無跌損情形其椿木碎石亦非全數衝沒外越現已堵合量其石底跌塘之處深一丈七尺較之林家西壩情形尙輕趕緊完工不致有誤開放且兩岸高二丈七八尺均係堅土結實可靠河流直下形勢亦順若改挑河頭則石牆石底均需另行創造需時更久爲費滋多且河形彎曲恐開放不順又南岸高二丈七八尺寬數十丈與開山無

異斷難改移臣等擬將義河跌塘處所亦照仁河石底一律填修較改挑河頭可省十數萬兩其壩下南北束水二隄所請擇要加幫補還缺口之處查北隄十七段計長一千一百三十餘丈南隄十六段計長一千一百九十餘丈內有衝缺一段計長一百零五丈擬准補還缺口俾宣洩水勢不致散漫其加幫工段應請緩修（以下三條載入運河水）以上各工除賠修擬駁擬緩及改歸歲修常年另案各項外其堰圩卑矮石工改砌碎石舊信壩補還石工智壩仁河義河填修石底束水二隄補還缺口揚河西岸加高包砌碎石並倒卸石工改拋碎石及裏河福興正閘各款俱係必不可緩之工臣等均擬本年及分年修理細加覈算統計現在所需約銀不過三四十萬兩竊維國家經費有常量入爲出南河工程每年歲搶修及常年另案銀數不下四百餘萬卽間有緊要工程儘可通融籌辦今臣等將各工逐處履勘擇要興修旣不虞其遲誤籌款較省復不至於虛糜應請飭下河臣張井照臣等查勘擬辦各情形確覈銀數奏明候旨遵辦現在于家灣合龍在卽臣等於拜摺後卽赴于工督查 奉上諭（本月十七日內閣奉上諭）前因張井奏黃運湖河各工上年水漲殘損請分別估辦以資修防當經降旨交朱士彥敬徵就近履勘具奏茲據奏履勘高堰山旰揚河揚糧裏河各廳工程分別急修緩修賠補各條朕詳加披閱所有高堰山旰廳屬擬加卑矮石工應加丈尺間有不符層數亦宜再酌卽准其加砌卑矮工段尙多仍不能一律配平應將賠補各工於本年盛漲前修補完整至卑矮工段處所請照現在揚河兩岸估砌碎石坦坡高五六尺將海漫石尾壓於坦坡之下較之加砌稍有撙節著該河督查勘情形奏明後分年覈辦其林家西滾壩勒令已革通判張慰祖照例賠修舊信壩外越護埽著補還石

工並照式幫寬土隄使內隄工一律齊整其壩後舊料儘可選用仍著確切覈估智壩仁河石底衝損照舊修復義河跌塘處所情形較輕兩岸土高結實可靠若改挑河頭石牆石底均需另行創造且與開山無異斷難改移應照仁河石底一律填修其壩下南北束水二隄應補缺口著准補還加幫工段暫行緩修揚河西岸絳隄衝刷坍卸情形較重冊造工段丈量相符著照式分年估辦其越河港起至高甘交界止照舊補還絳隄土工間段共長三千一百餘丈與上段隄工相連亦應修補著歸入常年另案款內動用修理揚河西岸倒卸輒石各工新工應令各員賠修舊工共長一千八百六十餘丈不能普律加砌既據查明洪澤湖石工土隄均係碎石包護連年並無掣卸所有補修石工著即改拋碎石現交春令糧艘將到運辦均需時日除新工仍令本年賠修外舊工拋護碎石應令分年估辦嗣後舊工如有倒卸著該河督均改用碎石保護隨時辦理至揚河及揚糧兩廳東西各岸土隄並輒石及各工及金灣以下緯道除應賠各工外著仍歸歲修成案辦理裏河廳屬福興正閘東雁翅場卸石工金門閘底間有跌損著確切查勘另估具奏即於本年趕緊修辦其惠濟越閘牆縫串水著緩至下年估辦以上應行修辦各工統計需銀不過三四十萬兩著張井即照該尙書等所奏情形確覈銀數奏明辦理

南河成案續編

按朱士彥敬徵爲欽差

是月十二日張井奏山盱義字河因石底跌通外越堵築已於上年十二月二十九日堵合斷流計長一百八十七丈隨即趕澆土戢以資後靠洪澤湖水誌現在落存一丈五尺三寸計于家灣堵合後該湖水無來源其落更速恐於濟運或有不敷復飭將束清壩再行收束留存舊制口寬九丈爲度並將

禦黃壩全行堵合俟黃河挽歸故道後察看高下情形再行相機辦理以利運行南河成案續編

是月□□日朱士彥敬徵張井奏爲桃南廳于家灣合龍壩工墊鑲穩定關門邊埽追壓閉氣事竊照于家灣正壩合龍經臣等恭摺奏報在案彼時西壩未經深水之工因正壩堵合水溜刷深該壩連上邊埽墊矮八九尺至丈餘不等計長二十八九丈間有裂縫之處情形頗爲喫重幸料物應手兵夫齊集竭兩日夜之力柴土並進外拋碎石得以搶辦平穩復於上水邊埽接進一占卽行掛纜趕進關門埽於二十三日追壓閉氣察看壩下翻花之處業已涓滴不漏仍令普律加鑲並於上水酌拋碎石以防續墊查前此金門收窄恐溜急埽游續進各占不得不更向上水越築現量正壩共長二百二十九丈寬八丈上水邊埽長二百三十六丈五尺寬四丈統計兩壩共做五十一占水深五尺至三丈八尺西挑水壩長四十五丈五尺寬六丈共做十一占水深六尺至二丈七尺其西壩下水因迴溜搜刷先經南接舊隄搶做柴土撐壩一道計長八十七丈寬四丈續又外鑲挑托柴壩六道拋護碎石現俱一律穩固所有壩後澆築土戩補還正隄土工先經臣張井彙入黃河隄壩於估辦湖河各工摺內奏請覆勘發辦茲臣朱士彥臣敬徵查係善後要工不容刻緩擬令於庫存銀內先行墊發派員趕辦不任稍有遲誤仍查照歷屆大工善後成案由臣張井另行核明奏撥還款至引河初放掣溜六分壩工合龍全黃復故僅爲暢順下游兩岸各工先經酌爲鑲修現經抵禦平穩外南順黃壩水誌連日報長連舊存水深三丈一尺七寸較量清水尙高黃水一尺五寸禦黃壩先於十八日堵合湖水更可蓄高濟漕會黃不致短絀 奉 上諭（正月二十九日內閣奉）本日朱士彥等由四百里馳奏桃南廳于家灣

合龍壩工墊鑲穩定關門邊埽堵閉情形並將在工出力人員懇請鼓勵一摺向來辦理河湖各工遇有潰缺處所委係險工疊出猝不及防人力難施事竣後在工人員著有勞績自應給予議叙至上年龍窩汛十三堡姦民聚衆強挖官隄該管各官漫不經心疎於防護以致姦民陳端等明目張膽執持器械攔截行人網縛巡兵將大隄刨挖殊出情理之外此次壩工穩定邊埽堵閉各該員縱有微勞亦屬分所應爲之事非歷次大工可比若濫邀議叙尙復成何事體朱士彥等所請懇予鼓勵之處著不准行首犯陳端起意糾衆挖隄日久未獲殊屬延玩著陶樹林則徐嚴飭所屬勒限緝拿務獲審辦不得以于家灣業經合龍河身已復故道置之度外如緝捕鬆懈致要犯日久稽誅陶樹林則徐恐不能當此重咎也張井等若無頂帶不足以資彈壓張井著加恩賞給四品頂帶王貽象張兆薛朝英著加恩賞給五品頂帶均著仍帶革職留任八年無過方准開復

又諭（承准軍機大臣字寄欽差尙書朱侍郎敬兩江總督陶江南河道總督張正月二十九日奉上諭）本日朱士彥等奏桃南廳于家灣合龍壩工穩定邊埽堵閉一摺據稱外南順黃壩水誌連日報長連舊存水深三丈一尺七寸較量清水尙高黃水一尺五寸禦黃壩先於十八日堵合湖水更可蓄高濟漕會黃不致短絀上年十月曾經降旨飭令有漕各省限於四月初十日以前全數償至清江趁黃水未漲之前趕早完渡轉瞬重運經臨湖水是否足資浮送清水既高於黃禦黃壩是否可以啓放抑或仍須倒塘灌運必應豫爲籌及免致臨事周章著該尙書等體察情形通盤籌畫妥議具奏南河成案續編

二月初九日朱士彥敬微奏再山肝廳智壩仁河南北兩牆先據該河督冊造均擬加砌石工三層經

臣等咨查茲據該河督覆稱上年洪湖盛漲水深二丈一尺九寸智壩石牆已入水二尺七寸仁河壩牆亦入水二尺五寸均應加砌三層高三尺六寸等語臣等查智壩石牆實屬卑矮擬准加砌其仁河本屬汛尾向係土隄擬毋庸加砌應請飭下河臣覈辦 奉 上諭朱士彥等奏查明智壩石牆實屬卑矮應准加砌其仁河本屬湖尾向係土隄應毋庸加砌等語著張井一併覈辦南河成案續編

三月十四日張井奏爲親勘黃運湖河各工遵旨確覈估需銀數恭懇撥發以資趕辦事竊照江境黃運湖河各工經尙書臣朱士彥侍郎臣敬徵逐工履勘先後列款奏奉諭旨著臣張井照所奏情形確覈銀數奏明辦理等因欽此臣思辦理工程非將層路丈尺逐細勘明不能得其確數況此次估辦各工臣自冬涉春督辦于家灣大工本未及一一親勘因於二月十三至三月初十日南抵揚州北至徐州按朱士彥等所奏情形將各工逐細確勘欽遵聖諭照擬估辦緣有辦理間形窒礙大汛尙難禦防如原擬分年辦理之工現有查應急辦不能分年者原擬加幫緩修之工現查河形地勢坐灣犯風仍應急辦者卽石工丈尺層路土工幫加尺寸較之原奏亦間有增減謹分晰確估情形另繕清單恭呈御覽所需銀數查朱士彥等前奏高堰山盱揚河揚糧裏河五廳必不可緩之工本年約銀三四十萬兩經臣覈請四十萬兩續奏桃南宿南睢南銅沛運河中河六廳現修隄工約銀十數萬兩臣詢據面稱約需十七萬兩二共估銀五十七萬兩在朱士彥等以經費有常力求撙節臣受恩深重具有天良何敢率估多糜上勞聖慮祇以黃運湖河各工上年同經異漲殘場過多原估工程經臣及朱士彥等剔除減緩業已省之又省臣現在估計復就朱士彥等所勘原冊銀數逐案覈刪並將朱士彥等所擬

裏河急辦開工改歸下年估辦揚河西岸倒卸石工改拋碎石剔除另估而確覈現估銀數尙需七十一萬餘兩卽剔除尾數於庫存銀內湊足較朱士彥等所估仍有不敷銀十三萬兩以南河近年用數而論此項不敷銀兩自應於歲搶修及例撥防汛銀內動支湊用無如歲請撥款及各省額解銀三百數十萬兩除額支歲搶修工程及官兵俸餉等款外餘銀一百數十萬以備常年大汛搶工及蓄洩啓閉減漲利漕各另案工程之用大約臨時搶辦者居多其先期豫辦之另案土石工雖近年亦於例撥款內通融支辦然覈其用數每廳不過數萬兩辦理已形竭蹶今以專款另案請銀發辦之土石工由臣及朱士彥等先後剔歸常年另案者竟至五十餘萬兩之多內如揚糧一廳常年另案歲不過三萬兩今年估辦至七萬有奇以此類推各廳所增更鉅實爲歷年所未有計歲搶修及防汛銀數旣爲先期預辦之工動用過多則此後臨時搶辦之工用款必有不足如再以專款不敷之銀取給於此誠恐伏秋險工猝出庫款無存屆時不無棘手設再如前兩年異漲尤爲岌岌可危因思估修各工欽奉上諭固不可稍有虛糜致經費不足亦不得概從撙節貽誤要工臣敬謹遵循再三籌計與其圖節省而貽患於日後不若慎籌備而稍寬於此時所有確覈現辦黃運湖河各工估需銀七十萬兩除臣已請撥發四十萬兩外合無仰懇皇上天恩俯准再撥銀三十萬兩飭部卽於附近藩關各庫照數撥發迅解河庫以資趕辦俾要工汛前速竣而河庫銀款亦不致絀於備防護將尙書朱士彥等勘辦黃運湖河各工除駁緩及改歸另案歲修外所擬本年及分年辦理工程遵旨確覈估需銀數分款開單恭呈御覽 一高堰山盱兩廳長隄卑矮石工朱士彥等奏請估砌碎石坦坡高五六尺將海漫石尾壓於

坦坡之下既省馬鞍埽工亦可抵禦風浪兼護石工子堰臣查高堰原擬加砌工長一千六百四十九丈二尺今除堰字四五號內工長二百八十三丈九尺仍應加砌大石外餘工長一千三百六十五丈三尺山旰原擬加砌工長一千四百三十九丈五尺二寸共計堰旰二廳工長二千八百零四丈餘尺估砌碎石坦坡前抵海漫石尾後與子堰頂相平共估需銀十三萬七千七百餘兩（此項工程照朱士彥等所奏分年辦理應請本年辦銀六萬八千八百餘兩下年辦銀六萬八千八百餘兩）又前項卑矮石工朱士彥等估砌碎石坦坡內高堰廳堰字第四號內一段工長一百九十七丈四尺堰字第五號接前一段工長八十六丈五尺二共長二百八十三丈九尺汛漲入水較多地勢犯風尤甚情形喫重仍應加砌大石二層以資抵禦共估需銀一萬二千三百餘兩 一山旰舊信壩朱士彥等奏請補還石工並照式幫寬土隄內外隄工一律齊整壩後舊料儘可選用臣查信字壩補還石工連兩頭石工拆修接縫共長七十一丈六尺後身補築土隄長六十三丈六尺並查舊壩金門中跌深塘新補石工應比兩頭低落十層另釘長大椿木石工外疊砌塊石簽釘排椿塊石外用土填平以資擁護舊料儘數選用仍估需銀七萬餘兩 一山旰智壩石底朱士彥等奏請照舊修復臣查智壩石底及三合土灰土衝損跌塘應估填塘補修並補釘梅花椿木其灰土以下深塘應拋碎石坦坡以資偎護估需銀一萬二千三百餘兩又智壩石牆卑矮朱士彥等查奏應估加砌三層臣查兩牆工長三十三丈估需銀一千五百餘兩 一山旰仁河石底朱士彥等奏請照舊修復臣查仁河南金剛牆場卸長十一丈大石底衝損跌塘長九丈石底下口三合土衝損跌塘四處應補修填塘補釘關石關土馬牙

梅花樁木並於南北兩牆下接築土堰二道外包碎石坦坡間築挑水柴壩共估需銀二萬三百餘兩
一山盱義河朱士彥等奏請將跌塘處所照仁河石底一律填修臣查義河衝損大石底及上迎水
碎石底下口三合土底均經跌成深塘應將三項土石各底照舊填塘修補釘關石關土排樁梅花
樁木其三合土外瀉水碎石底跌成深塘若再照舊填土平鎮碎石將來啓放仍難免於衝跌應就塘
面寬深改拋碎石坦坡以期堅厚並查該河兩牆亦有隙裂形迹應估拆修長十六丈兩牆迤下接築
土堰長五十一丈外包碎石坦坡簽釘關石梅花樁木又迎水碎石底外深塘牽水深五六尺一丈不
等應估填平共估需銀四萬三千一百餘兩 一山盱東水隄朱士彥等奏請補還缺口臣查該隄衝
缺一段長一百零五丈應行補還收頂寬二丈估需銀七千九百餘兩（以下六條載入運河水河水）通計
堰盱揚河三廳土石工黃河及運中河六廳土工本年急辦共銀七十一萬二千九百餘兩其堰盱裏
揚四廳下年分辦共銀三十九萬五千餘兩 奉上諭（四月初六日奉到三月二十四日內閣奉上諭）張井奏
遵旨確估黃運湖河各工請續撥銀三十萬兩以資趕辦一摺又另片奏于家灣善後土工墊發銀八
萬兩請撥還河庫以備防險之用等語俱著交戶部速議具奏 南河成案
是日張井又奏洪湖上冬存水一丈五尺八寸已較小於往年恐於濟運不敷即將禦黃壩於正月內
堵合湖水漸次見長旋據正陽關具報淮水於二月二十三、四、五、六、七等日共長水三尺五寸下注洪
湖截至三月十三日高堰誌樁水深一丈七尺六寸即當啓放禮字河以騰湖面而備續長其上年風
掣石工應歸今年估辦者查高堰廳自十二年三月初六、七、八日起至閏九月二十六日止共掣工長

六百六十二丈六尺三寸除新工賠修外實修舊工長三百八十二丈九尺二寸山旰自三月初七八日起至十二月續查止共掣工長一千六百十四丈三尺除新工賠修外實修舊工長一千九十五丈該兩廳所掣新工之下仍有接掣舊工層路南河成案續編

是日張井又奏再前奉上諭朱士彥等奏參革員賠修壩工並不認真致損壞更甚請在工枷號等語所奏甚是已革留工通判張慰祖承辦林家西壩先因遲玩參革迨賠修之後仍不認真致該壩損壞情形更重若僅責令賠修照例保固不足以示懲儆張慰祖著在工枷號一個月仍令趕緊賠修勒限於本年湖水盛漲以前一律完竣並著張井親往查驗如三次開放再有損壞情形除令賠修外即將該革員交刑部治罪欽此臣欽遵轉行淮揚道即將張慰祖在林家西工次枷號一個月仍令趕緊賠修旋據張慰祖以此項賠工估需銀三萬八千兩已於本籍山東金鄉縣趕速變產以資應用但工限已迫銀數復多一時斷難濟急稟求暫借庫項俾得依限趕完等情臣以張慰祖保固限內衝塌之工久經咨行本籍飭催賠修自應措資而來斷無豫冀借領之理況河庫現當支絀待發正款尙有不敷何能借給賠工致成將來追款即經批發淮揚道轉行嚴飭去後茲復據該道查明張慰祖賠修銀數及在籍變產未能濟急均屬實在情形張慰祖恐屆限不完獲咎更重仍請借領趕辦（硃批賠修之工何可借項辦理汝不能秉公持正一味討好屬員大負朕望且汝非河員出身甘蹈河員惡習朕爲汝惜也）自限九十月間照數繳庫轉稟到臣臣復查張慰祖賠修壩工如其屆限不完咎由自取本屬無可顧惜第減洩洪湖漲水以該壩爲最靈（硃批尙代爲巧辯河工惡習可恨可惡）如汛漲以前不能辦竣則洪湖少一洩水之路即堰

肝添一喫重之虞（硃批如因是擾肝有故張慰祖即當治以重罪汝亦不能寬貸也凜之）自應籌計通工暫行借給仍責成淮揚道遴派員弁稽查錢糧監催工程務令依限趕完報候臣親往查驗除飭取張慰祖繳銀限狀俾免延宕外所有借項賠修緣由合併附片奏聞 硃批（四月初六日奉到硃批）斷不准借項賠修又開一條門路另有旨 奉上諭（同日奉到三月二十四日內閣奉上諭）張井奏革員賠修壩工請借項趕辦等語已革留工通判張慰祖賠修林家西壩係保固限內衝塌之工自應措資趕辦豈有豫冀借領之理該河督先行飭駁所論甚是迨淮揚道以該革員變產未能濟急代爲稟請借項趕辦該河督即暫行借給殊屬非是賠修之工何可借項辦理該河督不能秉公持正一味討好屬員代爲巧辯大負朕望且該河督非河員出身甘蹈河工惡習朕復爲該河督惜之所有該革員應賠壩工斷不准借項賠修又開一條門路著張井即嚴飭該革員趕緊賠修勒限於本年湖水盛漲以前一律完竣並著張井親往驗收儻有草率偷減或因是堰肝有故張慰祖即當治以重罪朕惟該河督是問亦不能仰邀寬貸也凜之南河成案續編

是月二十日陶澍蘇成額張井奏查洪澤湖水截至十七日已長至一丈八尺又值黃水遞落外南廳順黃壩誌椿存水三丈四尺清水較高黃水一尺二寸南河成案續編 按蘇成額爲漕運總督

是日張井奏再查洪澤湖高堰水誌現已長存一丈八尺先於十四日飭將山肝禮字河啓放以資分洩南河成案續編

是月二十七日陶澍蘇成額張井奏連日以來湖水又長二寸高堰誌椿現存一丈八尺二寸黃水仍

見遞落現較清高於黃一尺八寸南河成案續編

四月十一日張井奏現查外南廳順黃壩誌椿存水三丈四尺一寸高堰廳湖水誌椿存水一丈八尺四寸清水較高黃水一尺五寸南河成案續編

是月十二日張井奏今年節候較早出月初旬卽交伏汛黃河兩岸修防固屬喫緊而洪湖已長存一丈八尺五寸尤覺盛滿堪虞臣惟當勉振精神竭力辦理不敢因交卸在卽稍涉懈弛南河成案續編

是月十五日陶澍奏再（上略）臣於四月初旬自省來浦經過揚糧揚河裏河各工均係高堰山圩下游爲歸江歸海之路復自清江浦至禦黃壩查看黃河兩岸均有要工亟須補還總之上兩年水勢過大一切隄埝各工雖經隨時搶修尙多殘缺或形卑矮而順黃壩黃水現已長至三丈四尺洪澤湖清水已長至一丈八尺五寸水勢浸高險工林立四月初七八日接連西北風暴堰圩石工倒塌竟至數百丈轉瞬大汛屆期設使清黃並漲修守必致不及思之實切寒心臣與張井逐悉商推應辦各工刻已難緩京報

是月十八日張井奏爲堰圩兩廳石工疊遇暴風壩埝多段現在趕緊撲護事竊查本年二三月間時有西北暴風堰圩兩廳臨湖石工間有掣卸之處長丈尙屬無多片段亦不甚大當令查明新舊分別修賠乃於四月初七日又起暴風仍係西北愈吹愈勁徹日連宵直至初八日夜間始息臣正在委員往查接據高堰山圩兩廳營稟報石工接掣多段沿隄馬鞍埝並山圩智信等壩外越護埝亦有掣塌臣隨卽飭令淮揚道王貽象河營參將張兆星夜前往該二廳確查倒卸新舊石工丈尺分投督飭各

該廳營趕緊籌辦去後茲據稟稱查得高堰廳屬上年歷次風掣石工六百二十七丈餘尺山旴廳屬上年歷次風掣石工一千五百三十九丈均已分別新舊估請補修因撥款未能接濟工員領辦較遲尙未一律修砌今自二月初三日起至四月初八日止三次風暴高堰廳境內續掣新舊石工三百丈零山旴廳境內續掣新舊石工九百七十四丈內統計新工長四百二丈零舊工長八百七十一丈零兩廳馬鞍舊埽及各壩外越護埽亦多掣塌並有大隄潰及堰根堰頂塌去三四尺之處情形較重必得趕緊摟護以資抵禦等情前來臣當令調撥外汛弁兵先就存工柴料碎石分投摟護摟節辦理臣亦卽前赴該二廳查驗明確再行酌發料物銀兩俾資趕辦

南河成案續編

是日張井又奏再查截至十八日止外南廳順黃壩誌椿存水三丈三尺五寸高堰廳誌椿存水一丈八尺五寸覈計清高於黃二尺二寸

南河成案續編

五月初一日張井奏洪澤湖水因安徽正陽關自二月二十三日起至四月初五日止報長八次共水一丈三寸高堰廳湖水誌椿長存一丈八尺五寸近始消落三寸其疊次風暴掣塌石工護埽臣昨赴工履勘添發正雜各料調集外營弁兵分別摟護加鑲日內卽可完竣山旴廳屬智壩仁河兩處金剛牆塌卸石底衝損跌塘等工前估補修填塘補釘關石關土各椿接築土堰包砌碎石坦坡間築挑水柴壩各工均已償辦全完經臣逐細查驗尙無偷減草率等弊應俟灰漿稍爲乾老隨時察看情形再行啓放以減湖漲至義字引河拆修牆石接築土堰填補深塘包砌碎石坦坡工程較大現已辦有六分餘工約月杪亦可蒞事林家西滾壩先經責成淮揚道押令革員張慰祖趕緊賠修續又添派委員

督催辦理不准藉端遲延南河成案續編

是月十三日張井奏近年南河工用之多少總以湖水之大小爲準本年洪澤湖水勢前已長至一丈八尺五寸月來天色晴霽共已見消一尺照依現今存水在昔年已稱盛漲而湖水長發總在夏秋大雨時行之際卽如道光十一年長至二丈九寸十二年竟長至二丈一尺九寸刻下甫過夏至此後長至幾許正難逆料最可慮者一遇西北風暴全湖巨浪掀騰撲過隄頂掣塌石工護埽及馬鞍埽子堰槽土等項不一而足統計風定後補修摟護一次動需銀數萬兩實不可以豫計且係刻不容緩之工必得河庫有銀方可隨時搶辦兼以下游揚河揚糧兩廳每逢山盱壩河全開水勢奔騰下注高寶諸湖不能容納漫過西隄東岸卽萬分著重不得不啓放高郵之車南中新及邵伯之昭關等壩稍資分洩兩廳一綫東隄搶修無已所用亦無定數此均年來辦理竭蹶經費倍增之實在原委也現在湖水因智壩仁河甫經修復灰漿尙未乾老義河及林家西滾壩尙未完工是以僅放禮字一河幸蒙皇上福庇黃水落低雖值湖水見消尙高黃水一尺有餘卽將外南廳禦黃二壩及臨清堰內鉗口柴壩相機拆展益資暢達歸黃又慮臨黃新河口門土隄過於刷寬儻值黃水驟長急難堵閉不得不在該處兩頭盤築鉗口柴壩壩身上下鑲做雁翅護埽以資保護其裏河廳之束清壩亦因清水暢出兩壩刷墊屢有加鑲凡此各項工程又皆前此數年所無統計本年大汛工需仿照往年銀數深恐尙有不敷實難再爲節減南河成案續編

六月初三日張井奏洪澤湖水勢前經消至一丈七尺四寸連日據安徽壽州呈報正陽關淮水續長